

**Namminersornerullutik Oqartussat nalunaarutaat nr. 17 ulloq 16. oktoberi 2007  
Piareersarfinni qitiusumik ingerlatsiviit suliaminnik ingerlatsinerat il.il. naliliisarneq  
pillugu**

Suliffissaaleqisunik sulilersitsiniarneq pillugu Inatsisartut peqqussutaanni nr. 14, 12. november 2001-imeersumi § 14, imm. 3 naapertorlugu, aamma Suliffeqarnermi innersuussisarneq il.il. pillugit Inatsisartut peqqussutaanni nr. 10, 18. december 2003-imeersumi § 2, imm. 2, § 3, imm. 3, § 5, imm. 5, aammalu § 12, imm. 2 naapertorlugit aalajangersarneqarput:

**Piareersarfiit pilersinneqartarnerat akisussaaffiillu**

**§ 1.** Kommunimi suliffeqarnermi ilinniarsimasutsikkullu suliniutit nukittorsarsinnaajumallugit kommunalbestyrelsi qitiusumik Piareersarfiit ingerlatsiviannik pilersitsisinnaavoq, suliffissarsiuussisarnermi, ilinniagaqarnissamik suliffeqalernissamik, piginnaanngorsaanermik sulisorisallu nutaamik ilinniagaqarnissaannut suliniutitsigut siunnersuisinnaajumalluni, tassunga ilanngullugit pineqartut ataasiakkaarlugit suliniuteqarfigineqarnissaannut inuttut pilersaarusiussineq, ilinniagaqarnissamik suliffeqalernissamilluunniit siunertaqartoq.

**§ 2.** Kommunilbestyrelsip akisussaaffigaa Piareersarfiup pilersinneqarnera aamma ingerlanneqarnera Piareersarfimmilu suliniutit pingaarnertigut tulleriiaarneqarnerat.

**Isumaqatigiissuteqarnermi tungaviusut**

**§ 3.** Suliffeqarnermut Inuussutissarsiutinullu Ilinniartitaanermut Pisortaqarfiup aamma kommunalbestyrelsip kiffartuussinissamut isumaqatigiissut naammassisanut atasumik isumaqatigiissutaasoq suliarissavaat, tassanilu Piareersarfiup suliassai immikkuualuttuulu aalajangersarlugit.

Imm. 2. Kiffartuussinermut isumaqatigiissummi minnerpaamik nalunaarneqarsimassapput:

- 1) Suliffeqarnermi ilinniartitaanermilu suliniutissani angusassatut siunnerfigisat.
- 2) Suliffeqarnermi ilinniartitaanermilu sullitassatut siunnerfigisat.
- 3) Ingerlatsineranut aningaasartuutitut tapiissutissat aningaasanut inatsimmi akuersissut tungavigalugit.
- 4) Naliliinerni uuttuutissat suuneri.
- 5) Kiffartuussinissamut isumaqatigiissutip sivissusissaa.

**§ 4.** Suliffeqarnermut Inuussutissarsiutinullu Ilinniartitaanermut Pisortaqarfiup kiffartuussinissamut isumaqatigiissut atorunnaarsinnaavaa, §§-it 6 aamma 7 naapertorlugit nalunaarusiortoqanngippat.

Imm. 2. Kiffartuussinermi isumaqatigiissummi aalajangersakkanik unioqqutitsisoqartillugu pisussaaffiliisinaaneq kiffartuussinermut isumaqatigiissummi aalajangersaavigineqassaaq.

§ 5. Kommunalbestyrelsip ukiumoortumik kiffartuussinnermut isumaqatigiisummi pisussaaffiit naammassineqarsimanerat pillugu Suliffeqarnermut Inuussutissarsiutinullu Ilinniartitaanermut Pisortaqarfimmut nalunaarusiortassaaq, nalunaarullu ingerlatsinnermut aningaasaliissutit naatsorsuusiorterannut ilanngullugu nalunaarut ukiumoortumik nassiuttassavaa, § 13 naapertorlugu.

#### Naliliinissami paasissutissanik nalunaaruteqartarneq

§ 6. Piareersarfiit suliaannik naliliinissamut atorneqartussanik kommunalbestyrelsip minnerpaamik ukiup affakkaartumik 1/1 aamma 1/7 makkua Suliffeqarnermut Inuussutissarsiutinullu Ilinniartitaanermut Pisortaqarfimmut nalunaarutigisassavaat:

- 1) Inuussutissarsiutinut ilinniartitaanermut qinnuteqartut amerlassusii, tassunga ilanngullugit ilinniagaqalertussatut akuerineqartut amerlassusii, inuussutissarsiutinut ilinniartitaanerni ilinniarnerminnik aallartitsisut amerlassusii, kiisalu akuerineqartunit ilinniagassaminnik aallartitinngitsoornerit sunik peqquteqarnerisut.
- 2) Ilinniagaqarnissamut inissat qassit Piareersarfimmut immikkoortinneqarsimanersut, inissallu qassit atorneqarnerisut. Ilinniagaqarnissamut inissat qassit pineqarnerisut imatut paasineqassaaq Ilinniagaqartunut inissat ilinniagaqarnerisutitalerlugit Suliffeqarnermut Inuussutissarsiutinullu Ilinniartitaanermut Pisortaqarfimmit akuersissutigineqarsimasut.
- 3) Pineqartut ineriartornissaannut pilersaarusiat Piareersarfimmik atuisunut tamanut suliarineqarsimanersut.
- 4) Suliffissaaleqisut qassiuneri.
- 5) Suliffissaaleqisut qassit suliffeqarnermi sulilernissamut piareersimasuunersut.
- 6) Inuit qassit Piareersarfiup susassaarfiini pikkorissarnissamut innersuunneqarsimanersut.
- 7) Inuit qassit ilinniagaqalernissamut piareersarnissamut ilinniakkanullu ingerlaqqiffiusunut innersuunneqarsimanersut.
- 8) Suliffissaaleqisut qassit suliffissamut innersuunneqarsimanersut.
- 9) Suliffissaaleqisut qassit suliffeqalersimanersut.
- 10) Sulisinnaannngorsarneqartut amerlassusiat.
- 11) Piareersarfiup suliffeqarnermut ilinniartitaanermullu sammisunik suliniutai, Suliffeqarnermut Inuussutissarsiutinullu Ilinniartitaanermut Pisortaqarfiup ilitsersuutai naapertorlugit.
- 12) Nalunaaquttap akunneri suliffiusut pillugit ilinniartitsisut suliassanut pilersaarutaat aallaavigalugit nalunaarsuutit.
- 13) Piffissap atuartitsinnermut siunnersuinnermullu atorneqartup annertussusia pillugu nalunaarsuutit.
- 14) Suleqateqartoqarsimappat suleqatigisimasat pillugit nalunaarsuutit.

Imm. 2. Minnerpaamik imm. 1-imi nalunaaruteqarnerit pineqartut ilaat ataaseq aamma imaqassaaq

- 1) Piareersarfimmi suliart pillugit ataatsimut naliliinermik,
- 2) Piareersarfimmut sammisumik kommunip nammineq suliniutaasa naliliiffigineqarnerannik, aammalu
- 3) kommunip nammineq suliffeqarnermi ilinniartitaanermilu 15-25-inik ukiulinnut suliniutaanut tungasumik ataatsimut takussutissiinermik.

§ 7. Kommunalbestyrelsip § 6-imi imm. 1-imi nalunaarusiornera qarasaasiat atorlugit programmit

Suliffeqarnermut Inuussutissarsiutinullu Ilinniartitaanermut Pisortaqarfimmit atugassanngortinneqarsimasut tunngavigalugit ingerlanneqassaaq. Kommunalbestyrelsip aamma § 6, imm. 2 naapertorlugu naliliineq nassiutissavaa.

Imm. 2. Kommunalbestyrelsip isumannaassavaa paasissutissat nassiunneqartut eqqortuuneri nutaajunerilu.

**§ 8.** Suliffeqarnermut Inuussutissarsiutinullu Ilinniartitaanermut Pisortaqarfiup nakkutilliissaaq kommunalbestyrelsimit paasissutissat nalunaarutigineqartut pillugit.

**§ 9.** Paasissutissat nalunaarsorneqartut Pisortaqarfimmut nassiunneqartut kiffartuussinissamut isumaqatigiissummi anguniagassatut aalajangersarneqarsimasunut sanilliuunneqassapput, Piareersarfiup anguniagassaatur siunniunneqartunut naapertuuneri nalilersorsinnaajumallugu.

### Tapiissutit naatsorsuutillu

**§ 10.** Aningaasanut inatsimmi aningaasaliissutaasut iluanni Namminersornerullutik Oqartussat Piareersarfimmut ingerlatsinermit tapiissuteqassapput, kiffartuussinermut isumaqatigiissummi suliassat aalajangersarneqarsimasut sularineqarnissaat siunertaralugu.

**§ 11.** Ingerlatsinermit aningaasartuutitut tapiissuteqarnermi piumasaqaataavoq kommunalbestyrelsip

- 1) Piareersarfimmi suliassat sularineqarnissaannut sulisussanik atorfinititsinissaa,
- 2) Piareersarfimmut naleqquttunik ininik isumaginninnera, aammalu
- 3) ukiumoortumik aningaasartuutissanut missingersuusiortarnermi qitiusumik ingerlatsiviup aningaasartuutissaanut missingersuusiortarneq.
- 4) §§-it 6 aamma 7 naapertorlugu nalunaarusiortarnissaminik isumaginnittarnera, aammalu § 13 naapertorlugu naatsorsuutit nassiussisarnera.

**§ 12.** Ingerlatsinermit aningaasartuutitut tapiissutit akuersissutigineqartarlutillu aquunneqassapput Suliffeqarnermut Inuussutissarsiutinullu Ilinniartitaanermut Pisortaqarfimmit.

Imm. 2. Ingerlatsinermit tapiissutit 80 %-ii ukiut tamaasa kingusinnerpaamik 1. februar tunniunneqassapput, ukiumullu aningaasanut inatsisip atuuffianut tapiissutaallutik.

Imm. 3. Ingerlatsinermit tapiissutit sinneri 1. oktober tunniunneqassapput, kiffartuussinissamut isumaqatigiissummi anguniagassatut siunnerfiit naammassineqarpata.

**§ 13.** Kommunalbestyrelsi ukiut tamaasa 1. februar nallertinnagu ukiumi siuliani ingerlatsinermit tapiissutit akuersissutigineqarsimasut naatsorsuutaannik nassiussaqaartassaaq.

**§ 14.** Suliffeqarnermut Inuussutissarsiutinullu Ilinniartitaanermut Pisortaqarfiup nakkutigissavaa ingerlatsinermit aningaasaliissutit tapiissutigineqartut atorneqarnerat.

Imm. 2. Paasineqassagalarpat ingerlatsinermit tapiissutit akuersissutigineqarnermik saneqqullugu allanut atorneqartut, Suliffeqarnermut Inuussutissarsiutinullu Ilinniartitaanermut Pisortaqarfiup ingerlatsinermit tapiissutit tunniussisarneq unitissinnaavaa, piumasaralugulu ingerlatsinermit tapiissutit tamakkerlugit ilaannakortumilluunniit utertinneqarnissaat.

*Atortuulerfia*

§ 15. Nalunaarut una atortuulerpoq 1. november 2007.

Imm. 2. Tassunga ilutigitillugu Namminersornerullutik Oqartussat kommunini inuusuttut sulliviinut tapiissutit pillugu nalunaarutaat nr. 37, 29. december 1995-imeersoq atorunnaarpoq.

*Namminersornerullutik Oqartussat, ulloq 16. oktoberi 2007*

Siverth K. Heilmann

/

Palle Frederiksen